

ABSTRAK

Kajian ini adalah merupakan kajian ilmiah yang baru bagi pentadbiran masjid-masjid di Brunei Darussalam. Tujuan utama kajian ini adalah untuk mengemaskinkan pentadbiran masjid-masjid masa kini sejajar dengan peranan dan fungsi masjid yang sebenar. Dengan menonjolkan peranan masjid menurut *al-Sunnah* sebagai panduan yang betul kepada masjid-masjid masa kini, terdapat beberapa perbezaan dari segi konsep masjid pada zaman awal Islam dengan keadaan yang berlaku sekarang.

Bagi melihat secara dekat akan permasalahan yang timbul dari kajian ini, serta untuk merealisasikannya menurut *al-Sunnah*, penulis telah membahagikan kajian ini kepada empat bab seperti berikut:-

Bab 1. Sebagai pendahuluan atau pembuka tirai kepada bab-bab seterusnya, penulis akan menumpukan perbincangan dalam bab ini mengenai dengan konsep masjid menurut *al-Sunnah*. Dalam bab ini, penulis memulakan perbincangan dengan menjelaskan beberapa definisi masjid dari segi bahasa dan syarak dengan menampilkan beberapa pendapat dan pandangan ulama yang muktabar mengikut bidang yang dibincangkan. Setelah itu, penulis telah melanjutkan perbincangan ini dengan membuat beberapa perbandingan konsep yang digunakan pada zaman Rasulullah s.a.w dengan penggunaan konsep yang berlaku pada masa sekarang.

Lanjutan daripada perbincangan di atas, soal-soal hukum-hakam yang berhubungkait dengan konsep masjid menurut *al-Sunnah* juga diambil kira, sama ada yang berhubung dengan kelebihan membina masjid, peraturan atau adab-adab dalam masjid dan beberapa pandangan ulama yang berhubung dengannya dimuatkan dalam bab ini.

Selain daripada itu, perkara-perkara yang berhubungkait dengan seni bina masjid juga diperbincangkan dalam bab ini. Dengan melihat kepada sejarah pembinaan masjid yang pertama dalam Islam yang diasaskan atas dasar takwa itu, penulis telah membuat satu perbandingan dalam perkembangan seni bina masjid mengikut apa yang berlaku dari zaman ke zaman, yang mana melalui perbandingan ini, dapat disimpulkan bahawa seni bina masjid itu telah berlaku perubahan dari masa ke semasa mengikut peredaran masa, budaya dan juga iklim setempat. Ketiga-tiga faktor ini tidak dapat tidak akan mempengaruhi struktur seni bina masjid, sekali pun tidak menepati asal usul seni bina yang sebenar.

Sebagai mengakhiri bab ini, penulis telah membawa beberapa contoh masjid utama dalam sejarah kehidupan manusia yang boleh dijadikan sebagai sandaran kepada pembinaan masjid-masjid masa kini.

Bab II. Sebagai lanjutan daripada bab sebelumnya, dalam bab ini penulis membuat satu pendekatan yang penting dalam kajian ini bagi mengenal pasti fungsi masjid menurut *al-Sunnah*. Dengan memberi tumpuan kepada masjid *al-Nabawi* atau dikenali juga sebagai masjid *al-Madinah al-Muawwarah*, penulis telah mengupas beberapa fungsi masjid ini dengan detil sebagai contoh atau sandaran yang sebenar untuk diaplikasikan kepada masjid-masjid masa kini. Melalui aktiviti-aktiviti yang dijalankan di masjid ini, menggambarkan bahawa tidak ada suatu institusi pun di dunia ini yang boleh mengatasi peranan dan fungsi masjid ini.

Bagi melihat perbezaan peranan masjid menurut *al-Sunnah*, melalui bab ini juga penulis telah membawa beberapa contoh masjid yang menurut ketetapan *al-Sunnah*, dan juga sebuah masjid yang terkenal disebut dalam *al-Qurān* sebagai menyalahi peraturan *al-Sunnah*. Penonjolan masjid-masjid seperti ini dibuat, adalah semata-mata dijadikan sebagai gambaran awal kepada pembangunan masjid-masjid masa kini agar mengutamakan *al-Sunnah* sebagai panduan atau landasan kepada tujuan pembinaannya.

Bab III. Bab ini adalah merupakan titik permulaan kepada pengenalan pembangunan masjid-masjid di Brunei Darussalam. Oleh itu, penulis telah menetapkan tajuk bab ini kepada institusi-institusi masjid di Brunei Darussalam.

Dalam bab ini, penulis lebih menekankan kajian khusus kepada sejarah awal pembangunan masjid di Brunei dan juga dari sudut perspektif perundangan Brunei. Kedua-dua faktor ini, perlu ditonjolkan kerana ia mempunyai hubungkait dengan pembangunan dan pentadbiran institusi-institusi masjid di Brunei.

Berdasarkan kepada fakta sejarah, masjid-masjid di Brunei pada masa dahulu adalah merupakan sebuah institusi yang sangat berpengaruh di rantau ini dalam menyebarkan ajaran agama Islam sehingga menggugat misi pendakwah Kristian di kepulauan Filipina oleh orang-orang barat. Ini menjadikan isu yang menarik dikemukakan dalam bab ini sebagai mengenang pahit-manisnya yang pernah menimpa dan berlaku kepada masjid di Brunei. Melalui pengalaman ini, pembangunan masjid-masjid di Brunei masih tetap menjadi agenda utama dalam pembangunan infrastruktur negara yang diwarisi sejak zaman-berzaman.

Selain daripada itu, turut disentuh dalam perbincangan bab ini ialah tentang pentadbiran awal institusi-institusi masjid dari perspektif perundangan Brunei dan sejarah beberapa masjid utama di Brunei yang dianggap sebagai pelopor kepada perkembangan pembangunan masjid-masjid dan dakwah Islamiyah di Brunei.

Bab IV. Bab ini merupakan inti pati kepada keseluruhan perbincangan dan pembahasan bab-bab dalam disertasi ini. Dalam bab ini, penulis akan memfokuskan kajian khusus ke arah mewujudkan pentadbiran masjid yang bersistematis. Untuk merealisasikan peranan dan fungsi masjid menurut *al-Sunnah* dapat dipraktiskan kepada masjid-masjid masa kini, ianya bergantung kepada kewibawaan dan kecekapan para pentadbir masjid itu sendiri.

Persoalan penting yang akan dibincangkan dalam bab ini ialah mengenai dengan perlaksanaan pentadbiran masjid-masjid yang tidak menunjukkan kemajuan yang sebenarnya. Kenyataan ini dapat dibuktikan melalui kaji selidik dan soal selidik yang dijalankan dan dibuat oleh penulis sendiri. Di dalam bab ini juga, turut disentuh ialah beberapa cara dan cadangan yang perlu diketengahkan untuk mengatasi kelemahan-kelemahan yang sedia ada, sama ada pada fizikal masjid itu sendiri mahu pun kepada para pentadbir masjid dan ahli-ahli jawatankuasanya.